

Newspaper	UTUSAN MALAYSIA
Date	08/09/2017B

## Nilai komitmen Dr. M terhadap Sabah dan Sarawak

**KUALA LUMPUR 7 Sept.** - Rakyat diminta menilai komitmen Tun Dr. Mahathir Mohamad terhadap Sabah dan Sarawak bersandarkan sejarah dan prestasinya dahulu, bukannya menerima bulat-bulat kenyataan beliau.

Ketua Pemuda UMNO Bahagian Papar merangkap Exco Pemuda UMNO, Datuk Armizan Mohd. Ali berkata, negeri Sabah dan Sarawak tidak mendapat perhatian yang sewajarnya daripada Tun Dr. Mahathir sepanjang 22 tahun beliau menjadi Perdana Menteri berbanding di bawah kepimpinan Datuk Seri Najib Tun Razak.

"Tidak seperti kepimpinan Najib, Dr. Mahathir menganggap pemimpin Sabah tidak layak memegang jawatan kanan dalam Kabinet Persekutuan.

"Jawatan yang sesuai untuk orang Sabah baginya hanyalah Menteri Tanah dan Pembangunan Koperasi dan Menteri di Jabatan Perdana Menteri tanpa peranan yang strategik," katanya dalam

satu kenyataan di sini hari ini.

Menurut beliau, keadaan itu berbeza dengan jumlah perwakilan dan portfolio pemimpin Sabah dalam sejarah dan Kabinet ditadbir Perdana Menteri pada hari ini.

Beliau berkata demikian ketika mengulas kenyataan Dr. Mahathir yang percaya pembangkang mampu mencatat kejayaan besar di Sarawak dan Sabah pada Pilihan Raya Umum Ke-14 (PRU14) nanti.

Sementara itu, Armizan turut meminta rakyat menilai pandangan Dr. Mahathir terhadap Sabah dan Sarawak lebih-lebih lagi tarikh keramat penubuhan Malaysia, 16 September yang tidak signifikan kepada beliau.

"Najib sebaliknya bukan sekadar menjadikan 16 September cuti umum malah di awal menja-

di Perdana Menteri pada 2009, 16 September telah diraikan dengan lebih signifikan dan bermakna.

"Ia bukan sekadar persoalan cuti atau perayaan, tetapi perkara ini boleh menzahirkan bagaimana seseorang pemimpin melihat dan mengiktiraf kedudukan Sabah dan Sarawak," ujarnya.

Katanya, peruntukan pembangunan luar bandar yang diberikan oleh Perdana Menteri sekarang untuk Sabah dalam tempoh lapan tahun mengetuai Kerajaan Persekutuan lebih banyak berbanding 22 tahun Dr. Mahathir menjadi Perdana Menteri.

Dalam pada itu, dalam nada sinis, Armizan berkata, Dr. Mahathir patut bercakap lebih banyak tentang Sabah dan seeloknya turun berkempen membantu Parti Warisan di Sabah.



ARMIZAN MOHD. ALI

Um - 8/9/2017 pg. 9